

四庫全書

集部

欽定四庫全書

集部
鳴盛集卷一

詳校官庶吉士_臣李傳熊

中書_臣劉源溥覆勘

總校官庶吉士_臣倉聖脉

校對官中書_臣葉 棻

謄錄監生_臣任 鑑

欽定四庫全書

集部六

鳴盛集

別集類五

明

提要

臣等謹案鳴盛集四卷明林鴻撰鴻字子羽福清人洪武初以薦授將樂縣訓導歷官禮部精膳司員外郎年未四十自免歸事迹具明史文苑傳明初閩中善詩者有長樂陳亮高廷禮閩縣王恭唐泰鄭定王褒周元永福

王偁侯官黃元而鴻為之冠號十才子其論詩惟主唐音所作以格調勝是為晉安詩派之祖李東陽懷麓堂詩話曰林子羽鳴盛集專學唐袁凱在野集專學杜蓋能極力摹擬不但字面句法併其題目亦效之開卷驟視宛若舊本然細味之求其流出肺腑卓爾自立者指不能一再屈也是在宏正之間已有異議周亮工書影曰閩中才雋輩出彬彬風

雅亦云盛矣第晉安一派流傳未已守林儀
部高典籍之論若金科玉條凜不敢犯動為
七律如出一手云云是其末流且馴至為世
口實然鴻倡始之時固未嘗不卷容諧雅自
協正聲未可以作法於涼遽相詆斥況高棟
尚不免庸音鴻則時饒清韻尤未可不分甲
乙一例擯排矣此本為成化初鴻郡人溫州
知府邵銅所編未有銅跋稱覽其舊稿慨然

興思因詳加校勘補其缺略然如張紅橋唱和詩詞事之有無不可知即才人放佚容或有之決無存諸本集之理此必銅樵小說妄增之夢游仙記一首疑亦寓言紅橋之事觀其名目乃襲元稹夢遊春詩可以意會銅亦附之簡末殊為無識葉盛水東日記載銅天順中為御史以言事忤權姦左遷知縣則其人亦錚錚者或平生以氣節自勵文章體例

非所素嫻歟乾隆四十三年七月恭校上

總纂官臣紀昀臣陸錫熊臣孫士毅

總校官臣陸費墀



[illegible]

鳴盛集原序

元氣行乎宇宙間膚而直者為人其清淑者為明哲為英豪性之為道德發而為詞章至於聲詩又詞章之清淑而最者也吾友林鴻子羽早穎悟獵涉羣書提要鉤玄去其糟粕而掇其英華悉取資以為詩自盛唐以上歷晉魏漢氏十九首楚辭三百篇皆沈浸醲郁一日援筆而賦動數十什洋洋大篇溶溶短章皆新奇俊逸馳騁若騏驥浩蕩若波濤清絕若雪山冰崖皎潔若瓊琚

玉佩擇其尤者置之韋柳王孟間未易區別臨川王先
生郁一見而異之曰此大厯才子復見於今矣且天性
個儻樂山水好翱翔率嘗與予登道山清冷臺薛老峰
泉石膏肓風雲氣槩故其詩邁俗軼塵良有以也今年
冬與予相會太和宮因出所製一編而求序予辭不獲
故秉翰而題其首雖然以吾子之才之美進進未可量
也若登泰岱之峰愈高愈低將小天下矣則桓雖謏材
又將執筆從而序君之別藁尚未晚也洪武三年冬吳

興倪桓序

詩家者流肇於康衢之擊壤虞廷之賡歌繼是者泯泯
乎三百篇之音流而為離騷派而為漢魏正音洋洋乎
盈耳矣六代以還尚綺藻之習失淳和之氣唐興陳子
昂氏作障厥狂瀾杜審言宋之問沈佺期李嶠又從而
歎之至開元天寶間有若李白杜甫常建儲光義孟浩
然王維李頎岑參高適薛據崔顥諸君子各鳴其所長
於是氣韻聲律粲然大備及列而為大厯降而為晚唐

愈變而愈下迨夫宋則不足徵矣元有范虞楊揭趙數
家頗踵唐人之轍至於興象則不逮焉噫文與時遷氣
隨運復不有作者孰能與之今觀林員外子羽詩始窺
陳拾遺之閫奧而駸駸乎開元之盛風若殷璠所論神
來氣來情來者莫不兼備雖其天資卓絕心會神融然
亦國家氣運之盛馴致然也謹題其集曰鳴盛為之序
云洪武庚申季春既望嘉議大夫禮部侍郎權吏部尚
書廬陵劉嵩子高序

欽定四庫全書

鳴盛集卷一

明 林鴻 撰

五言古體

擬古 七首

北辰何巍巍居為衆星宗
玄冬杓在北青陽乃旋東
七曜潛幹運四時自成功
靜觀造化機毋乃君道同

其二

神龍潛深淵不在尺水池
飛鳳將鍛羽亦擇梧桐枝
玉

以貞自珍蘭以幽見奇君子莫屈身身屈道乃卑

其三

迢迢洛陽城雉堞何逶迤上有天子宮下列公侯居外
廐鳴騶裏中饋進鮮肥身無澣濯服路有餘梁脂巍巍
金馬門云是上天梯仕宦有捷徑請託無虛時布衣謁
公家言拙氣亦卑丈夫無所求守道寧食薇

其四

倦僕秣我馬駕言將驅馳戚戚感路人問我去何之答

云商山路幽谷多紫芝樂與素心人採掇療朝饑
聽斯言揮淚持我歸舉手謝之去吾駕不可違

其五

翩翩雙白鶴久在樊籠中刷毛向朝日舉翅傷秋風
雖蒙惠養恩自比雞鶩同歎息此珍禽默默傷余衷
放之煙霞表飲啄詎見蹤

其六

秋月何皎皎素魄流虛堂攬衣步清影玉露生淒涼
感



之獨徘徊驚波疾流光雖無景公淚惻惻還堪傷世路
多榛棘人心競羊腸得酒且須傾毋令空鬢霜

其七

千金買駿骨寧與駑駘同乃知陶潛翁避俗甘固窮縱
酒愛五柳折腰若為容葛巾漉春釀庭柯響青璫怡然
日為樂自視村野農而我頗踈散失身塵網中翹首企
高步遙遙安可從

感秋 十九首

撫劍中夜起氣候何淒清天高白露下北斗當前楹
嗷嗷雙飛鴻隨陽亦宵征微禽爾何知寒暑櫻其情始知
玩物化中復念吾生三十志有立一經尚無成緬懷古
哲人信與大運并道在無終始時來暫衰榮感歎不能
寐延首東方明

其二

中夜有遐想假寐登崑崙飄飄列仙人授以漆書文
鳳振其羽三芝吐靈根文螭為我駕赤豹為我蹲覺來

戶牖虛明月當前軒服膺念古訓抱經究微言中道誠
可尚荒謬何足論

其三

大人秉乾德精誠應純剛在天麗星日在地為丘岡六
龍無停馭大化何茫茫喈喈玄圃鳳知時亦鳴陽伏鼠
忌靈曜飛蟲惡炎光陰類各自私至明庸何傷

其四

太古號無事其人如鹿麋塊然具中和焉用禮樂為三

皇不同軌五帝亦異治練絃與明水汲汲挽其瀉哇淫
起鄭衛綿蕞紛秦儀聾盲世耳目真朴無復遺大運暫
衰歇至理豈盈虧鴈行與魚躍誰用此道推所以橫渠
翁千古有餘悲

其五

姬轍既東馭羣雄踰其防夷氣熾六合陽精黯無光壯
哉東海君歟起垂衣裳霸圖雖熒熒王道終茫茫麟經
托南面筆削嚴秋霜至今千載下共戴君為綱

其六

陽精自東生陰魄復西沒兩曜無停機萬古一超忽方
平笑麻姑綠鬢已成雪誰識青青松蟠根向溟渤

其七

秋氣悲萬物攬衣坐中庭仰視明月光俯聞候蟲鳴人
生會有涯歡樂當及時榮期但長歎墨子徒自悲驅馬
被紬綺雕盤割鮮肥酒酣論意氣中心貴相知終當委
運去得飲無復疑

其八

至人不凝物逍遙可延年貪者乃徇名冠蓋卧丘樊懷
璧讐匹夫深藏貴若淵邦家覆佞口仲尼欲無言始終
互相竭盈虧每旋沿默觀一元運至理猶張絃

其九

威鳳志八表鷺鳥思遠擊志士徇苦節秉心猶鐵石黔
穀恤齊饑餓者嗟輟食朝歌墨回車勝母曾不入悲哉
表旌日行矣申屠狄世無成子高疇能掩真跡

其十

君位曰大寶惟聖能矜持彼狂亂其經縱欲日淪迷夏
桀墜禹服商受傾湯基盛國向沉湎投身殞蛾眉禍福
共倚伏理亂亦相因下民尚有嚴皇天本無親姬文掩
枯骼四海咸稱臣

十一

季世尚遊俠使氣凌諸侯就死輕一芥含恩重山丘荆
卿觸秦怒漸離重燕憂小節若可尚大義非良籌嗟哉

黃金臺千古令人愁

十二

朝登北邙坂墟墓何纍纍懷哉泉下人惻然我心悲
往若不可復來者每如斯膏火煎萬族紛紛競刀錐
生存華屋居死與草木萎愚智同土壤英靈竟何知
所賴賢哲士千齡名不隳

十三

大塊覆羣迷疇能會其妙狂夫每如醉至人獨先覺
草

木養氣體金石駐精魂多岐但驅車孰踵玄門漢武
志三島秦皇窮八垠焉知淡泊水可沃靈臺焚

十四

大化有培覆貧窮固其常奈何東鄰子索居多慨慷在
桁無懸衣晨飧曠儲糧飢寒不自保妻子安得將投杖
出門去仰逐浮雲翔周流極四海組練歸故鄉寄語寰
中士空乏庸何傷

十五

四時互相竭兩曜無停軸
夏炎方滿盈秋氣忽已肅
空閨有佳人十載常獨宿
中心豈不貞處閣誰見燭
願為明月珠流光照君屋

十六

空谷有隱士服食常不周
藿羹笑鐘鼎祖褐輕王侯
樵漁有時閒但與麋鹿遊
持身豈不隘安命固無憂
我願見其人欲往道無由
迷途諒未遠反策營吾丘

十七

聖人處憂患微言在明夷世人昧獨處悔吝相與期君
看文毛豹隱霧南山陸寄言狂馳子昌用此道推

十八

聖人立名教朋友居人倫異體相謀合惟德可為鄰何
如便佞子婉孌來相親昔為金與蘭中道若參辰投以
明月珠按劍反見嗔對面隔山岳欲達路無因數疏既
有戒昌言跡非真惟應管鮑交此道恒自信

十九

聖哲尚中道大哉美隨時出處雖殊途久速與運期莘
野方釋耒九五以為師西山去不返殷士寧食薇鴻鵠
橫九霄鷦鷯安一枝物類同如此子心何所疑

堯階

伊昔陶唐氏垂衣貴無為所存昏墊憂焉知宮室卑土
階一何陋荒蕪任茅茨雖云三尺崇足仞千載基陟降
趨四岳攝升朝百揆雍容揖讓間庶績皆咸熙彼昏瓊
其臺惟狂瑤其池亂階一以啓顛躓良在茲吾聞大聖

人廣居宅八陟禮門既大闢義路亦載馳居處雖儉素
德業乃巍巍勗哉後來人可以為箴規

無諸釣龍臺懷古三首

無諸昔建國赤土䟽王封築臺青冥上垂釣滄江龍乘
龍去不返千載如飛蓬只今荒臺上寂歷多遺蹤我有
太古懷來吟江上峯天青海氣滅地古寒煙濃潭水綠
萬丈秋岑碧千重登臨未能已落日催孤鐘

其二

甌閩古夷服無諸漢英雄秦鹿既已死却辭隆準翁組
練照海色旌旗來故宮赫矣茅土業大哉開闢功事往
滄海變龍飛霸圖空昔日釣龍臺空餘江水中桂殿苔
色古空陵雲氣紅朝夕卷寒潮隱隱聞雷風登臨畢餘
景感歎無終窮

其三

無諸東海上有國在秦先一朝逐秦鹿戈甲相勾連高
才已得志論封亦徒然歸來築高臺投竿釣蜿蜒屠龍

雄按劍拂拭滄洲煙英風振海岳古月經蠻天昔人不
可見蹤跡復堪憐閒來弄秋水漁情藹清川雲高碧海
淨日落千山妍莞歌古臺上醉向酒家眠

西狩

顓頊閉天地玄冥始司冬明堂敞八水井邑間九農東
魯考王制西狩收歲功天仗列鉅野雲師掩象蒙鳴鐘
地震列焰川原紅置張六合窄囊括九有空熊羆既
股栗豸虎無留蹤夫何玄枵精亦困鉏商弓五趾運坤

軸孤觸鳴蒼穹舉武中矩度流音若黃鐘虞人一驚告
尼父心已恫瑞物際顏運嗟哉吾道窮遺經告文成筆
削垂至公飛霜礪斧鉞白日開鴻濛感歎終絕筆千古
來悲風

塞下曲

交河冰是路天山雪作花舉頭猶漢月沒足已胡沙遠
戍連烽火嚴更起清笳將軍帳中卧萬馬夜不譁國恥
猶未雪壯士莫思家

其二

宛馬金作勒壯士鐵為衣橫行出塞門日落黃埃飛
匈奴卒至士卒被重圍戰餘平野中惟見空鞍歸家
中白頭母猶自倚寒扉

為陳少府賦望雲

高臺臨廣達上抗浮雲端遊子思親闈登之以遐觀
親闈不可見白雲阻河關顧茲好爵縻何當一承顏
登山山有岐涉水河有湍王事雖賢勞敢辭陟岵難
青天何

茫茫大地亦盤盤
歸袖欲奮飛
願附鴻鵠翰

寄衣曲

漢月絳庭樹
胡霜拂城樓
邊人一夜寒
深閨始知秋
起來理征衣
纖手一何柔
雙杵幾不勝
寸心未能休
梧葉下浙浙
草蛩鳴幽幽
月明嗟慰意
風急復含愁
白露下蘭心
蘭心亦枯槁
妾家有高臺
下見漁陽道
明發寄征人
三挹靡蕪草

題罔極堂卷

孰謂江海廣江海亦有涓絜我父母恩浩蕩斯無涯依
依念終養惕惕常如飢鞠育信勞悴欲報將何為仰睇
孤鴻翔俯悼寒蛩悲豈無舟與車徬徨將何依高堂儼
陟降愴然方在茲感彼樹上烏朝出暮乃歸微物具至
情未遂反哺私我何抱深痛拊膺淚如絲哀哀九泉下
永以長酸嘶

謁昌黎先生祠兼呈王潮州

窮冬到南海驅馬韓山灣繁霜野水落鱣溪清且寒伊

昔潛修鱗白日飛風湍壯哉昌黎翁洪流靜而安伊余
謁遺廟兼以窮遐觀地古白雲滅潮來滄海寬夫子繼
芳躅而能障波瀾丈夫遇知己遲暮彈吾冠

哭迭漳州

九原何茫茫哭聲迴彼蒼含悲復含喜身死名不死夷
哉清漳途可駕睢陽軌永激後來人千秋作臣紀

春日首陽懷古

東風蕩霏霽旭日生巖巒清飈洒襟佩聊以窮躋攀遊

目俯高墳歛然復悲酸清標香名立幽壤芳骨寒孤騫
仰鸞鳳鳥雀易所飧濁流激清波洒然天地間古木翳
芳祠野蕨迷空山遲回竟將夕振策未能還

本一齋

元始但一氣厥狀含鴻濛卑高猶未陳至理已混融粵
從太極分玄白自污隆天澤肇履象中正根民衷三皇
不沿轍五帝亦殊風萬殊雖支離一體當貫中天地乃
吾體清明元在躬寄言希顏徒勗哉克已功

驅車篇送張志道奉親柩歸清潭

驅車出東門我車已載脂况此苦寒月歌此陟岵悲風
駕指晨星日入不遑棲道路豈不遙筋力亦云疲飛鳥
為我吟孤禽為我啼浮雲結為旆迴風亦淒其引領望
故山丘壘何累累感彼首丘志懷哉蓼莪詩

指佞草

元氣殊萬類惟人最通明夫何此靈草亦識讒諛情揚
揚吐奇芬母乃太微精孤根寧獨立不與凡卉并宵衣

朝百辟丹陛秋風生姦回既屏迹利口亦潛形周未徒
同穎漢芝空九莖雖能誇美瑞曷足資治平寄言持斧
者可與同令名

方節婦詩

北堂樹萱草我憂終不諼念彼結髮人湔與朝露先眷
言在諸孤曷敢同下泉昔看俎豆嬉今見弱冠年慨賢
夏侯傳永歌柏舟篇懷哉古人心白首敢自憐

羅浮觀日圖

昔有學道者擔簦海上行
宴坐羅浮峰內視觀無形晞
景正東豁滉漾扶桑明雲濤
既洶涌龍獸亦悲鳴吾聞
混沌分坤軸東南傾百川走
空虛日乃生窮溟未覩大
明運安知至陽精願從列仙
徒散髮倚雲屏三花漱雲
液五內含晶熒回觀羅浮圖
陋哉山海經

心逸齋

二五妙凝合清明在吾軀
惟心萬物靈湛然抱中虛
知誘由外感逐物情乃趨
以茲巧偽萌營營實勤劬
若人

金方氏集卷一
志前修作意惟聖謨百體既順正天君日安舒靜處守
仁宅紆行由義途希顏古有訓勗哉逢掖徒

海上讀書

浮雲薄海色萬里如秋空青蒼杳無際島嶼蟠蛟龍上
有讀書者結茅誰與同朝餐海上霞夕友滄江翁乘桴
嗟尼父把釣思任公猶慕魯連子不受却秦功千金若
土壤清名弔高風愧予老儒術白首且相從

贈昇玄子

希夷本無象廣漠難具論孰知玄子名強曰衆妙門至
人守無為目擊道乃存精神應龍健變化迎鵬搏四氣
歸素籥三花洞天根逍遙大塊中豈在登崑崙

飲酒

儒生好奇古出口談唐虞倘生羲皇前所談乃何如古
人既已死古道存遺書一語不能踐萬卷徒空虛我願
但飲酒不復知其餘君看醉鄉人乃在天地初

甘露甕

汙罇已寥閭土鼓久不鳴大鈞吹洪爐厥器陶甄成厥
器彼伊何儲彼天地精庶徵順時若至和妙勻凝醇醴
結五色晶液若瓊英天既不愛道人胡惜其情所以大
聖君篤恭天下平

題唐亨仲三友圖

賦質異根本秉心同歲寒脩然山林資陋彼桃李顏雅
操類三益賞心齊二難寄言端居者冰雪宜相看

金雞岩僧室

遠公青蓮宇百尺構雲關一徑入松蘿山泉濯苔髮石
房彈玉琴清響在林樾夜來滄海寒夢遶波上月微吟
白雲篇高興了未輟未能悟聲聞安得離言說

遊芙蓉峯

密竹不知路渡溪微有蹤懸知石上約定向松間逢物
候變黃鳥芑蒲花蒙茸相望不可即裊裊霜天鐘

秋江獨釣圖

清飈晚溜溜白水明濯濯投竿坐盤石風葉衣上落吾

心與天遊寧知取魚樂

為朱氏賦石潭軒

飛軒瞰古潭潭色杳深翠靜淵如有容
混混百源會秋臨天影寒夜漱月華碎
吾心若虛空何物為蓬累

同周秀才立與東白明遠二上人期宿芝山不
至

屢居厭紛擾恒思宿陰岑夙期道門友共茲清夜吟
彈冠起新沐微風披素襟行行止空門夕景條已沉
不見

雲中僧虛堂閉煙林應物本無住焉知來去心良會既
已睽中情一何深詠歸值新月聊復鳴吾琴

題遊魚圖

深水荻芽短淺水荇葉稠逐隊聚還散戲波沉復浮東
鄰已結網西家潛下鉤江湖可相忘予心何所求

泛舟西江

積水可利涉方舟况同乘悠然西江上遂望雲中僧出
浦見落日前崖陰始凝秋風忽颯沓海雨隨奔騰稍移

流沙河又見夕影澄擁棹向危壁推篷見古藤枕藉信
水宿躋攀候晨興茲遊意多愜况也多良朋

題醉道士

黃冠何羽人恍是全椒客一壺常兀兀以飲混其迹歸
來秋山空卧向松下石誰知郡齋人含情正相憶

經東山別墅

別墅在東山經過感疇昔縱橫醉時墨猶在池上石林
氣颯以涼山容淡將夕緬懷携手人念念不能釋

寄丘令

海國民俗古清朝民物閒况茲得良牧理人絃誦間吏
散日已夕雲歸鳥隨還高齋蔭嘉樹橫琴對遠山伊余
安蹇劣歸休謝朝班出處雖異途雲林近怡顏茲焉仰
高風望望心所攀

送湖南歸粵

志士本激烈况當離別情直氣不得發逢秋吐商聲浮
雲蔽長空驅馬去孤城廣川無輿梁一葦詎能橫將尋

故山隱自芟荒草耕蠹書束高閣龍劍日夜鳴行路由
正途能使山岳平端居息機心卧聞螻蟻爭知君重交
結臨分吐平生

寄袁憲史

金風動林木朱炎謝餘暉新涼起羸疾振我塵中衣貧
居滿衰草鳥雀遶庭飛閒心本無營看山忘渴飢念茲
素心人于今宦情微粵鄉初搖落滄江鱸正肥晤言一
携手共息胸中機

斬蛇劍

秦氛熾天地大澤蟠蛇蜒潛龍厄初九鹿迹方茫然千
里送徒人三盃拂龍泉紫劍混赤精紅光吐青蓮壯哉
三尺鋒可以摧金天粉首明月中飲血秋風前素靈何
嗷嗷老淚翻蛟涎芒碭起風雲咸陽若浮煙揮洒六合
清提挈神氣完始知百鍊鋼永與金刀堅

赤壁

西瞞竊漢統東面朝諸侯鼎足猶未分屯蒙迷九州桓

桓長沙裔歆起揮戈矛兩雄不並立固知寧相謀朔風
吹旌旆飛霜肅晚秣飲馬涸天塹投鞭填山丘建業既
震蕩羽檄如星流衆議徒瑣瑣獨斷誠嘉猷振劔碎玉
几揚旗建車舟周郎拂白羽談笑有良籌馮夷鼓駭浪
天吳扇雄颶烈焰蕩萬壘飛灰喪千艘論功何顯赫返
駕誠包羞再光東都業一洗瘡痍瘳往事既漫滅山川
尚綢繆昔聞龍虎爭今見麋鹿游峭壁絳海月洪濤漲
清秋訪古弔陳迹開樽發冥搜醉來卧煙靄天地如蜉

蟬

題草澤遺書

買斧入城市伐木歸中林
中林多樛木實勞匠者心
林深聞無人清風聞嘯音
雲濤既浩蕩龍虎亦悲吟
筋力既不惜但恐白日沉
願言秘大樸俯首從哇淫

酒醒

酒熱中夜起散髮微風前
煩襟忽冲散高咏蒼涼天
湛池和露藉虛庭留月眠
寧知明日事聊復一欣然

曉登金雞山呈王六博士

劍客無所懼登高眺清曙於時值搖落况乃閒遊阻關
河一千里飛鴈杳難度積水明秋空蒼山落寒楚荒涼
誰問俗慷慨即懷古長嘯歸去來餘意在蘭杜

送尚抱灌往閩南采詩

予生草澤間鼓腹歌唐虞奈何際板蕩奮劍當前驅千
金酬壯士白璧買良姝放浪裘馬門嗜酒縱博市朝
既變更部曲歸里閭三十始讀書謬為章句儒閉門謝

賓從窮巷生寒蕪南山既嘯傲擊節聊自娛故人西北
來將歸滄海隅自言河岳英以俟觀風車忽忽僕馬疲
寥寥歲云徂積雪照天地嚴冰寒江湖祖席臨東門欲
發仍躊躇贈之五雲章飲以雙玉壺

答黃逸人

大道如砥平我車不方軌明時世景清夫子乃蓬累有
客天上來為說黃金臺所市既駿骨所羈乃龍媒五月
上武陽炎風焚大荒豈伊道路難欲往河無梁華門逢

君子酣歌日中市披髮行且吟時人盡驚異既知歸日
落欲往秋風作誰同寧子歎且效榮叟樂離別遠將歸
涼風吹布衣南飛有鴻鴈毋使信音希

春日同諸生野飲效陶體

始春風日嘉出門竟何之所欣携諸生駕言陟嶽嶽谷
風已噓萌好鳥亦鳴枝蔬果屬時新有醪已載卮中觴
發意氣列坐各言詩悠悠天壤間斯樂希浴沂

夢清冷臺寄冶城舊遊

羣山際海上道山獨蒼蒼上有清冷臺碧蘿蟠石床伊
昔盛冠蓋琴樽此翱翔暮色海天冷秋風松澗涼今來
阻登臨獨有夢飛揚題寄同心侶願因南鴈翔

岷峨秋晚

岷峨一千仞秀色橫清秋雲蟠隴蜀盡水入巴江流旭
日海上來蒼蒼樹色浮陽厓氣已變石林陰未收疏鑿
有古跡登臨仍壯遊落日下層巔懷哉神禹憂

雙竹軒

開軒遠山際讀書修竹陰以茲歲寒枝况此君子心雖
無萬竿玉庶比雙南金天風有時來鸞鳳相和吟外直
秉堅操中虛含素襟何當煙雨夕夢遶湘江深

送黃玄之京

予也夙穎悟十五知論文結交皆老蒼稚爪攀修鱗冥
心三十年尋源頗知津探玄始有得服膺如獲珍誓將
覺後生庶以酬先民干祿鑪水库歲星七周循青衿二
十徒達者唯黃聞三十為禮官制作多述因前年乞骸

歸甘作隱逸，倫業窮道。豈遷操危氣，愈伸持此欲。有授
二玄乃其人，時登烏石山。眺遠滄海濱，逸興發猿嘯。閒
情投鳥羣，既與簪紱疎。頗同緇錫鄰，朝遊必竟夕。夜吟
常達晨，放曠宇宙間。外視埃壘身，匏斟日動爵。劒舞風
披巾，醉來各鵬張。揮洒如有神，坐或藉青草。倦應眠白
雲，大運迭盈虛。人事常參辰，詎知同心者。胡為遽離分，
于時雖孟冬。膏車戒征輪，借問子何之。囊書上成均，執
手念門友。登堂辭老親，驅馬西郭門。祖帳螺江濤，朔風

捲行旆木脫波翻翻請為壯士吟庶以撫中熟丈夫志
四海況乃觀國實惜別語刺刺無乃兒女仁壯懷何以
贈臨期解青蘋

終南積翠

終南太古色積翠無冬春陽崖俯荆楚陰壑開函秦碧
樹曉未分蒼蒼散參辰下蟠蟄水龍上有避世人有時
浮爽氣往笏可攬結安得構精廬談經對松雪

方前朝贈

天地有神氣方崩東南青高標窮碧落連峰走滄溟深
探地無際遠見日初出蜃氣乍蒼涼龍光猶恍惚始知
至陽精明明含中虛沿旋綴陰魄幹運乾坤樞願言吸
晞景庶以永年歲手把扶桑枝身騎六鰲背茲焉對畫
圖飛夢遶芳巖一笑天雞鳴晴窗已東白

贈彈琴黃生

高館敞秋夕而多修竹林讀書有時閒游心復鳴琴露
月稍低樹清風遂彌襟持茲保貞素庶以忘華簪

溪南小隱

夙性尚幽素卜此林泉居雖無珪組榮而有山水娛靜
言一室中撫已常澹如窗間有鳴琴几上惟素書芳晨
得朋簪清樽與之俱憩木愛佳鳥臨川羨游魚棲神縱
八表誰言形迹拘惟願榮啓期斯樂同只且

琴所詩

伊昔大舜氏作琴歌南薰五絃具中和如彼天地仁姬
文伯姬武繼作更述因云何去聖遠疇能會其真初聞

新安郡追古有先民翕然大音奏澆風反其淳人亡餘
故丘末路多荆榛所欣文獻存繼志無緇磷高才何巍
巍仰止惟德鄰師襄如可作千祀猶同倫

寄龍大潛效韋體

夙負偃蹇志共懷林下心誰言塵事縻以茲曠幽尋夏
火方云始索居念朋簪薄携一樽酒命駕來城南湛湛
晨河流依依嘉樹林晤言有時間揮觴共鳴琴久要或
可冀希哲信難任君懷諒不乖惠我瑤華音

送黃秀才歸西鏞

外貌苦物役中心貴所知如何千里別值此清秋時驅
車弔古臺暢飲黃金卮疾風海上來黃葉四散飛鴻鴈
叫蘆渚鰲蛸結桑枝感候意方戚送遠神乃馳離隔勿
復道久要長若斯

題龍川書隱

世業本淮南幽居枕龍川冥心謝珪組秉志師聖賢耕
鑿有餘閒軒窗富芸編夜雨雜春誦薰風清夏絃湯湯

伊洛流澹澹洙泗淵會趣洞精要探賸窮幽玄求志業
已崇行義理則然希君保貞素逍遙以永年

富春釣臺

維舟富春渚舒嘯登崔嵬不見羊裘人空餘垂釣臺苔
色石上古秋聲松際哀清風猶可仰落日滿蒿萊

哭陳憲使

刈蘭無餘芳燬壁一成塵漢法密如網清波無修鱗陳
人有嫺裔秀出吳江濱曰惟洪武初奉檄始來閩感彼

古哲人結交亦有因芝蘭既同臭膠漆情愈親時從登高丘懷古共酸辛栖栖天地間不得一日春浩氣久鬱結吐為五色雲遂使鬼神妬坐此終殞身才高名不揚道存志不伸生為衆士憐死為萬鬼鄰汝母既已老汝妻乃初嬪汝魂歸無家汝子歸貫墳兄弟既徂遠朋友久且貧九原深無窮彼蒼高不聞銜哀欲有訴吞聲難具陳千齡萬祀後有懷在斯文

夜酌邑庠留別

高梧結朗月密竹深寒煙虛堂敞清夜桂酌開華筵論
心機暫忘念別情已懸值此羣動息始知詩境立行當
泛蒼波去矣阻山川落葉擁成壘飛霜清海天鴻燕有
詩還傾蓋知何年願持松柏操永與金石堅

同周孝廉夜宿郡庠有述

乞身共棲遲聚首殊契濶子卧清溪雲子弄滄海月人
生駒隙耳歲月坐超忽欣茲一樽酒信此百憂輟晤言
不知疲高歌清夜發久要諒無違保已終華髮

留別諸彥

秋堂閑虛寒晚竹引深翠
暝然孤燈坐興與一壺對天
冷霜滿襟露飲月窺醉曲盡別意深相看發長喟

精岩寺

香刹象天界名僧辭世氛
一峯獨凌削衆壑相氤氲作
禮向金仙宴林投鶴羣山犬
街人衣却走避腥羶於時
春向暮林亭藹餘暉蒼然草
木氣盡濕西江雲登閣見
千里眇懷滄海濱山鐘忽播
蕩應此悟音聞

訪陸隱君不遇

結屋依兩崖疑是秦人家不見山中人風落青松花掃
石調素絃尋泉飯胡麻願因玉麒麟緘書投紫霞

經延平津

昔人雙寶劍經此化神物晉室已寥寥劍光猶未沒紅
纒斗牛氣黑漾蛟龍窟千里一寒流馳波向溟渤玄化
窅莫測沴氣閉復開有時潭水止白日飛雲雷伊余探
靈異狂歌負奇懷回船向明月浩蕩秋風盍

別龍秀才

龍生不羈者愛士能開襟每醉玉壺酒復為梁甫吟訪
余鏞水陽又將歸故林秋風樽前別落日川上心四郊
已蕭條千里無飛禽離思苦難說望遠猶登臨

同王六博士宿煙霞觀

昔人煉金鼎此地餘還丹至今風簾鳴猶疑下笙鸞出
嶺訪靈異投山宿天壇一片月色古千秋松影寒醴泉
為我酒丹霞為我殮都無世人夢但佇風中翰夫子苟

有意相期此投冠到家興未已更取吾琴彈

游玉華洞

真仙構靈宅洞府何嵌空入洞可十里流水咽其中陰
島濕花露石門度松風怪石變萬狀尋源竟無窮有時
起雲霧微徑又不通觸目極杳靄游心但鴻濛路盡忽
有天容光澹空青蛻出風露外了然心目醒幽興殊未
已又還宿雲扃飛夢即蓬島冥心祈道經終悲向朝市
塵鬢秋星星

翠簾山天湖

翠簾高凌天峰麓曠且平何年此蟠龍遂成秋水泓呼
吸納元氣溟濛變陰晴雲雷地中起日月波上生上有
空僧巢岩栖煉神形寥寥水月觀洞見心胷明我昔凌
天梯恍若登赤城浮杯動松影發笑回天聲從茲便高
舉永極雲霞情

同王六入西山尋白雲僧

秋山晚蒼蒼引興白雲際方聞出谷鐘未返沿源騎躋

攀霽心目始到三摩地苔色陰際寒松聲靜中細空僧
此岩棲心寂跡如寄經誦有時聞了了見山翠抱琴者
誰子夙性貪幽致雲卧復何為冰絃隔秋意西峰條含
景石榻又假寐身寄孤鶴巢夢如幽蘭氣夜分氣候白
隱隱月初至陽澗澹空明陰林破深邃久懷緇錫鄰頗
與雲山契章甫如可投期君訪靈異

訪玄章師不遇

真僧駐錫處雲床在西峰應物無所住安知來去蹤今

來結青謠又向何山逢白日無經聲金颺但鳴松懸思
永今夕杳靄秋天鐘

秋夜憶周模

傾盖一分手沉思長在襟况茲離居夕復此秋城砧露
下葉初落草根蟲又吟雖云感物候終念曠幽尋劒水
東南流故人千里心無因達尺素夢遶青楓林

道中偶詠

林館夕暫休星駕曉仍發沉沉樹若煙浩浩溪如雪白

首倦長途青山笑予拙

秋夜期盧道士見宿不至

掃石待瑤駕焚香立陰階如何道機熟反使音期乖
暝色帶疎竹秋聲連夜齋無因問丹訣默默此時懷

宿黃梅五祖寺

佛祖說法處迴與諸天鄰珠宮厯浩劫桂殿餘真身
登攀訪靈異禮謁知宿因地遠泉石怪人間猿鳥馴
松杉覆窗戶濕竹清衣巾花雨出深夜天香來暮春
久知簪

組妄思與緇錫親所希慧燈影為余照迷津

遊海上瑞岩

海國橫秀色茲山何鬱盤黃金亘樓觀積翠開峰巒登
高恍如遊駐目窮遐觀地迴雲物古天秋松桂寒於時
潮風清更涼淨液瀾精思落天外回飈生羽翰嘗聞有
靈章可以駐顏顏且畢濟時畧金梯期再扳

石竹山紫雲洞

羣峰際東海一峰凌紫雲昔人煉丹處石室莓苔紋飄

飄龍虎車即此上丹闕惟留白鶴影宛在青松月下有
靜者廬其人頗淳龐一水落天鏡萬花明石窗藥食有
時暇還來叩岩闌心與魚鳥樂身隨天地閒伊余困流
俗十載未應還長歌賦招隱夢遶天涯山

題徐漬湘潭離思圖

荆南不堪別孤棹向何處人分鴻鴈秋樹帶瀟湘雨離
思亘重襟登高但凝佇

送吳士顯

吳生鴈蕩人脫畧當世事欲識平生心悠悠江海是布
衣何飄飄孤劍千里至斗酒未及歡看雲起歸思長風
吹古城寒石下秋水分手從此辭車塵望中起

酬外兄林大見寄

衰孱謝時耀索居久荒蕪顧茲升斗祿遂與田園疎文
墨互紛紜舍館若僧居齋中無餘物草木盈前除緬懷
桑梓遙况與親愛迂舉頭望飛雲清興與之俱飄飄西
南風翼彼五雲書豈惟比兼金欲貺無瓊琚撫運感離

間銜哀念先廬泉臺未及封舊業應翳如失路已窘步
孤生歎多虞仰慚南枝禽俯愧同隊魚沉憂髮已種撫
事心已痛裁詩重於邑安得膏吾車

飲馬長城窟

羸秦亂天紀紫塞徒經營千秋扶蘇血脉脉流泉聲吾
聞渥洼龍中天應房星所以千里駒翩然來漢庭

題江上琴興

太樸本無事大聽元希聲何如伯牙子尚懷山水情我

有太古調欲托絲桐鳴人間正寂寞毋使蛟龍驚

同鄭二宣江上泛舟

載酒入江邑酒多江正長酣來散予纓濯向春流香東
壁過疎雨西崦殘夕陽猿禽相嘯叫雲水共清蒼夕景
更汎覽客程殊未央魚風葦上起蚌月波中光嘗以事
泮與永期名迹忘乘槎予豈必聊復咏滄浪

今日良宴會

今日良宴會歡娛在須臾念我平生友日夕萬里途廣

筵羅雕饌酣歌鳴玉壺對之豈不樂相見生嗟吁勲業
苟未樹綢繆將焉如

江閣秋雲圖

山容初斂夕雲氣已歸壑何以散冲襟孤琴坐江閣美
人期不來天寒楓葉落

邯鄲行

玉貌邯鄲女少小來深宮春芳羞百媚秋水明芙蓉君
王一愛惜白日生春風春風不長好妾顏豈長保一作

玉階別衷腸向誰道憶昔少年夢不向邯鄲飛今日還
思君時時望金扉雖作泉下土悽悽何所依

門有車馬客

門有車馬客徒侶何輝煌銀鞍耀白雪寶劍明秋霜借
問客從來謝官歸故鄉且言昔別君君年正春芳聞言
謁天子聲價靄玉堂龍顏霽霄漢虎變麇文場寧知一
失意白日沉夜光秋鬢非舊絲映帽多星霜區區附驥
尾薄宦歲月長解組且歸去投君叙溫涼嗟我聞客言

慚愧獨彷徨大鵬反鍛羽燕雀終翱翔
扼腕勿復道長歌臨碧湘

題張少府夢澤高秋圖

夢遊秋水碧醉眺晚山閒
短棹發吟思酣歌放狂瀾
浮雲秋際來藹然芳樹間
青蒼太古意天地同瀰漫
荆門正西上樹古生早寒
漢水日東逝冶遊多苦顏
鴈思落芳渚漁情寄清灣
願期同心人結屋江上山

泉石清逸

久為泉石人了與世塵絕朝飧清礪霞夜弄碧蘿月掃
石奏吾琴尋泉飯胡麻長謠古苔篇似是仙人家陶令
歸栗里安石棲東山心將槁木灰跡與浮雲間有時窮
跡攀落日更吟眺碧草藉醉眠玄猿引長嘯冥棲笑流
俗何用寰中名千秋放意氣永極雲霞情

題秋江漁釣圖

移舟向潭石投釣臨寒流餘懷本澹蕩况此滄江秋白
日既濯濯清颺何瀏瀏適意非在魚所希與神遊悠哉

共恬淡惟應沙際鷗

雲林清隱

夙性抱高致端居厭華簪
尋泉鑿石壁結宇依雲林
經鋤有時閒班荆坐檉陰
清飈引長嘯白雲勸孤斟
處默謝流俗任真曠冲襟
惟應同調者聽我丘中琴

海天跨鶴

滄溟控東極滉漾寬扶桑
飄飄鶴上仙馭氣以翱翔
碧落為我蓋丹霞為我裳
放神逐九有吸氣調三光
驂鸞

笑羸陋策駿嗟穆荒逍遙大羅天歸來良未央

玉泉

良玉本溫栗流泉尚清泚磨礱制器用疏鑿達源委偉哉瑚璉姿可以薦明水願言崇德輝永矣喻君子

贈劉子服兼呈菊老

杯酒見交情微言發天機寥寥江海間荒途乃相知擊筑對修竹酣歌當古池乘桴昔何歎獻策亦應遲如何魯連子功成無是非

送劉子服兼寄建溪諸知己

路歧一為別壯心將奈何雲山寄遠迹歲月空蹉跎
緬懷建溪客離憂空沉痾孤松偃礪壑荆棘結岩阿
已唱銷白雪秦箏妬雲和遂令懷古調感歎一狂歌
鹿門自耕作東山卧雲蘿褰裳擷芳芷投竿餌清波
浮雲自東來青天鬱嵯峨明月遙古意芳樽恣吟哦
雖云念白首終歲守蓬窩

夏夜金溪泛舟

落日溪上昏登舟泛中流涼飈動林杪天際行雲收月
色望不極水天共悠悠叩舷發清聲谷響如唱酬濯纓
懷孺子洗耳思巢由誰能逝羊腸感歎生百憂明日期
角巾登高恣追遊

海門秋望

雲崖聳高寒攀躋覽溟海試拂龍唇琴餘音散蒼靄月
搖波影中葉度秋聲外矯首蓬萊宮仙人笑相待

滄海雲帆圖

朝暾出海嶠漠漠蒼靄分仙人駕舟楫乘風馭長雲飄
飄紫霞珮追逐丹鳳羣晤言瑤池宴將以謁明君夔龍
接前踵奎章落雄文望之不可極海色空氣氤

贈醫者

採藥入雲林賣藥來城市肘後多蓄書壺中可藏世三
葉即立功一視惟博施今古孰與倫良哉宋清氏

齋中曉起

颺颺城鴉散瑟瑟戍鼓絕空庭寂無人衣上有殘月清

池盥漱罷高韻風中發爽氣山前來吾襟抱冰雪

遊武夷九曲

秋風泛瑤棹愛此佳山川九曲汭流月數峰標暝煙開
闢自天地飛昇有真仙石上蛻金骨雲中鳴夜絃伊余
探古迹得復窮幽玄間招木客飲醉向天壇眠不見紫
陽翁徒歌白雲篇余懷在漁釣即此應忘筌

夏日登宿雲臺有述寄霜月上人

投簪返初服躡屐謝紛擾永言卧丘壑庶以狎魚鳥茲

臺夙所憩磴石出煙篠况逢朋簪盍煥景共臨眺前瞻
極空濶下瞰洞深窅地古雲木殘天長海山小真僧此
冥棲宴坐閤昏曉喻心青蓮淨說法天花繞願聞微妙
音意泯萬緣了豈必東林人相逢可同調

九仙山樓觀

仙山有樓觀虛爽軼浮埃昔日九仙人跨鯉茲山來赤
鯉去不返仙人安在哉空餘彈碁處白石生蒼苔至今
別人居往往聞風雷微雨古壇暝禮星寒殿開常聞至

人言內景融春臺羣生若芻狗大道如嬰孩馳車與天
接豈但登蓬萊

登清涼臺

吟秋有佳月照曉登清涼揮手援碧蘿騰身棲翠屏長
風吹雨來不覺羣山青鳥度白雲濕龍歸滄海腥真僧
此岩棲樹空影禪靈竹塢見曝衣花臺聞演經沃以甘
露言迷迷醉而醒願言割茲愛永也投禪局

同諸生登絳月蘭若

金人青蓮宇乃在白雲裏久與名僧期乘閒却來此入
門聞經梵結壁見巾履落磻泉影紅侵廊蘚花紫海天
正南豁一望見千里獨樹川上浮孤煙島邊起予生况
多暇所性樂山水真賞非外求冥心巢居子

題任生水南山房

新安山水郡昔賢躋豆鄉志士應昌運幽人潛葆光青
冥南山遠綠緝春溪長世外鑿霞壁雲中開草堂經鋤
有時間方舟復鳴榔鳥度鏡天淨人間潭水涼尚想鹿

門隱猶思愚谷藏
珪組苟無心禽魚亦相忘
伊予懷故林
碧蘿盤石床
因君賦招隱
鼓枻歌滄浪

題異上人挂月軒

迢迢青蓮宇
寂寂野僧定
片月挂虛空
羣厓破陰暝
雲窗晃玉毫
露幔捲金鏡
色映天影寒
光凝古潭淨
常聞止水觀
可以喻禪性
夜久悟音聞
空山響煙磬


夏日遊幻住蘭若

青山古城曲
溪水相縈紆
尋山避燠景
喜得金仙居
水

石翳洞古松蘿覆窗虛俯見蘚痕積遙知人跡疎願以
青蓮界永期紛垢除流咏發天籟洗心清道書遲遲至
棲鳥望月歸吾廬

夜宿郡齋水亭呈林八博士

孤琴水亭夕客至罷鳴彈況有樽中醪斟之罄情懽濯
足向清泚披襟散塵煩仰見海上月兼之天籟寒齋舍
何蕭條蓬門若丘樊深竹讀書處百蟲鳴夜殘予懷良
已舒為君咏幽蘭



鳴盛集卷一

欽定四庫全書

集部
鳴盛集卷三

詳校官庶吉士臣李傳能

中書臣劉源濟覆勘

總校官庶吉士臣倉聖脉

校對官中書臣葉葵

膠縣監生臣任鑑

欽定四庫全書

鳴盛集卷二

明 林鴻 撰

五言近體

出塞曲 九首

壯遊誰憚遠西北是臨洮
駿馬銜金勒行人看寶刀
隴雲吹曙暗關月倚秋高
早赴防邊壘三軍待六韜

其二

從軍呼延塞勒馬單于臺
天地兵聲合關河秋色來
酬

恩憑玉劍致遠見龍媒旦夕邊城上喧喧笳鼓哀

其三

玉關秋信早未雪授征衣王者應無敵邊塵不敢飛三
河兵氣盛五道羽書稀日晚笳聲發將軍射獵歸

其四

單于秋近塞驃騎遠臨邊吹角風沙動揚旌日月懸
鵬防獵箭戰馬識烽烟昨夜旄頭黑前軍得右賢

其五

驍馬畫弰弓生為北塞雄探兵千里外捉騎萬人中虎
帳秋懸月龍旂暮颭風歸來領旌節立在未央宮

其六

大漠窮陰外孤城蒼莽間星河秋近塞雪電夜沈山戍
久戎衣綻時清列燧間近聞游騎息不敢問陽關

其七

衛霍邀勲日三河聚控弦陣雲寒壓地獵火遠燒天玉
帳分旗直金戈枕月眠羽書飛報捷天子在甘泉

其八

十五薊門行能探點虜情潛兵秋度磧牧馬夜歸營苦
霧沈旗影飛霜濕鼓聲昨來承密詔東築受降城

其九

烟塵起西北驅馬到長城萬古征人恨秋風隴水聲雪
埋金甲重月照寶刀明昨夜聞鳴鴈中原有弟兄

瓊林宴

柳暗百花鮮瓊林設綺筵玉簫仙島月銀燭紫微天坐

列龍池畔名題鴈塔先醉歸扶上馬袖惹御爐烟

擬李翰林宮中行樂

柳色浮金殿花香近玉樓嬌鶯聞荳石語燕傍瀛洲
旭日明仙仗香車映御溝笙歌何處響還向未央遊

月

玉宇淡悠悠金波徹夜流最憐圓缺處曾照古今愁
風露孤輪影山河一氣秋何人吹鉄笛乘醉倚南樓

送日本使歸國

歸舟雲海別斷梗杳無蹤萬里隨風去三山何處逢客
程浮日夜鄉樹隱魚龍縱有相思字何由寄一封

送高郎中使北

漢使臨邊日天驕已請和看花辭紫陌犯雪度交河水
草留行帳雲沙想玉珂誰知清漠北婁敬策居多

擬唐太和公主和番

粉淚辭丹禁紅顏冒虜塵南天惟有月北地更無春笳
鼓凝芳夢軒裾掩翠顰年年桃李月淒絕舊宮人

送侯官張少府調青田

少府移官日春城正熟梅露濤侵畫舫海月近離盃
烏化雙鳬去琴同一鶴回括蒼山水好不減粵王臺

訪邵隱君所居

隱君讀書處門巷少行塵竹塢琴邀月花林鳥近人
衣冠猶古制泉石是南鄴散帙多閒日休嫌問字頻

同徐總戎登汴梁相國寺樓

傑閣千尋起平原四望開旅魂秋易斷鄉思醉難裁
魏

國空流水梁園半野苔登高能作賦不獨子雲才

題福山寺陳鉉讀書堂

窮經不出戶一室古珠宮燈影秋雲裏書聲晚磬中
開窓明竹雪散帙落松風料得無人到焚香對遠公

送王勲銘歸溫陵

遠遊俱未達念子獨南歸萬里扁舟去秋風一布衣
城鴉隨雨散汀葉逐人飛為報無媒者滄洲意有違

送陳煉師歸龍虎山

鶴書歸未夕秋思夢瑤峯海上看山別人間何處逢烟
蘿深見月洞府暗藏龍辟穀方無術憑師問赤松

送蔡大往汝州尋弟

落葉正紛紛秋城客路分知君從此去遙念鵲鴒群楚
水帆飛雨荊山路向雲懸知孤館夕離鴈不堪聞

別王六博士

攜手出東門離懷不可論人分殘雨色江轉白雲根予
亦辭家久君因問故園行當霜橘熟幾日醉朋樽

春日遊道山亭

危亭臨絕頂勝槩昔曾聞
野酌薰花氣閒心狎鳥群
簷前看落日衣上見歸雲
半醉題詩去仙凡下界分

遊棲雲湖禪室贈日東圭上人得心字

東海到來日西山始布金
構雲天路上標月夜湖心
問偈逢樵客忘機狎野禽
寥寥塵想絕相對坐檀陰

遊天王寺得王字

金門辭隱吏寶地謁空王
碧磴飛龍樹青山遶鴈堂
露

吟蘿卷幔雲卧石為床莫嘆春歸盡天花晚更香

西峯寺

西峯雲外寺鳥道薜蘿蟠水接花源遠山藏古殿寒石
床間聽雨野佩或紉蘭莫怪棲遲久南宮已挂冠

湘南秋思圖

蒼茫臨極渚眺望黯離愁湘南一葉下始覺天地秋
草已云暮碧雲殊未休不見林中士緘情投白鷗

九日登臨

不到寺已久入門籬菊開山容帶紅葉鳥迹遍蒼苔卧
掩維摩室吟登般若臺慙非陶靖節誰送一樽來

月夜乘舟圖

孤榜向何處洞庭秋氣多天寒風起夕江靜月沈波還
輟觀魚樂因之鼓枻歌醉來迷去所應恐犯星河

同倪十宿浴公房

一入維摩室逢人宿鶴群鳥驚春嶂月花卧夜溪雲漱
齒發清諷焚香了梵文冷然鐘磬動應得悟音聞

東林四景

長歌遊玉華歸思浩無涯
旅夕多逢雨城春少見花
山鐘知遠寺海月憶貧家
此意何人會行吟到日斜

題周可仁滄洲趣

隱居鮫室近日夕見滄洲
吟處月生海坐來風滿樓
忘機能狎鳥適興或垂釣
予亦乘流者因之發棹謳

秋夜同林四景宿烟霞道院

入山塵念空清夜宿琳宮
高枕碧蘿月銜杯松桂風
衣

冠人世外天地玉壺中君但頻來此應逢洗髓翁

張生養愚軒

昔聞愚谷隱今見踵高風處世貴囊括索居惟養蒙銜
杯山翠裏高枕水聲中古有逸民傳非君孰與同

題憑高送遠圖

高丘晴見海送別一登臨落日扁舟去秋風萬里心江
楓寒墮葉山店靜聞砧行矣無餘物隨君有鶴琴

題碧蘿山房

一入烟蘿去終年獨考槃竹泉宜夜聽松月耐秋看桂
酒邀佳客荷衣護早寒向予相顧笑持贈碧琅玕

紫騮馬

將軍紫騮馬幾度出安西積雪埋龍臆河水響玉蹄百
戰功堪並千金價自低吳門秋日晚長倚北風嘶

龍山亭

新亭依絕壁隱隱見游塵詎識鳴琴吏能邀落帽賓銜
杯山翠晚散帙鳥聲春自愧非王翰何由遂卜鄰

答王子敬

孤舟夜泊方塘側
月明天清吹笛夜
江闊扣舷秋欲
盡
志士憂天下
已如病馬嘶
一解因子濯清流

訪荆士黃定思梅峯臥雪

梅峯佳處近山阿
有聲如仙曰晏無
雞犬雲間枕石眠
秋風
志士憂天下
已如病馬嘶
一解因子濯清流

行脚僧

朝辭暮宿向何處
白雲度磴逢馴象
浮河亢毒龍
衲

經何限雪山過幾多峯年老無勦力方懷故院松

樵上逢黃逸人

山徑分風袂秋城冒雨逢自言澆藥處應在最高峰故
業連衰草空齋隱暮蛩知君同苦節獨有歲寒松

夜宿芙蓉峯

香剎瞰林丘逢僧信宿留風簾乘月卷露簾犯涼收宿
鳥微喧曙明河澹瀉秋一經空寂境人世漫沈憂

別鄭處士

參軍趨幕府上將遠徵兵征旆隨春色鳴撓雜海聲桐
花城外曉漳水霧中明故吏如相問毋煩道姓名

久別王六博士

少年為俠客晚節着儒衣故里交游盡天涯相見稀汀
花隨桂櫂江月照金徽獨有南枝在聊同鵲夜飛

留別蔡秀才原

別離無遠近暫去亦傷神正是千山雪誰悲獨往人江
空螺女夜花暗冶城春不見同遊侶酣歌淚滿巾

塞上逢故人

五陵攜手罷定馬各天涯出塞難為客逢君似到家後
期如夢寐前路正風沙只好長安陌垂鞭醉落花

月夜酌別龍秀才

共向孤城別愁為永夜吟一竿滄海去千里白鷗心短
髮秋同老清樽月共斟冶城多酒伴遲爾寄徽音

寄王六博士

閒歌與醉吟誰識此時心燈火秋堂靜星河夜漏深懷

人看玉劒寫詠拭瑤琴直道原如此寧論物議侵

贈彈琴吳生

之子蘊秀氣能彈綠綺琴坐來秋月下如聽水龍吟一曲動天籟七絃傳古心他年江海上勿謂少知音

送陳令歸浙東

揮淚曉臨岐空江臘盡時重關逢雪度足馬見星移拱木青山望甘棠赤子思懸知陟岵處回首益淒其

送林十朋之京

祖帳呂江濱空嗟客路分一經推歲貢千里惜離群
臆近梅欺雪天寒鴈斷雲玉堂逢掖貴雄筆看摛文

海上有述呈治城諸友

漲海窮炎裔方舟利涉勞島青雲樹合潮白雪山高
挂席嗟蓬梗分簪念爾曹始知川上喻逝者自滔滔

題海上天竺寺

登艫浮海邑陟嶠訪禪天經室行山鳥香厨逗礪泉
塵蹤孤島外夜梵一燈前幸沐無生話秋襟自颯然

憶浮丘生

瘴海民風異炎荒客路難
午深猶見霧騰盡不知寒蚌
月開晴島蛇珠射暗灘
居夷雖可學懷土淚闌干

懷黃玄

別去情何限憂來淚滿襟
人皆知點玉孰與辯疑金
月照吳門樹霜飛建業砧
最憐詩社散悽絕獨長吟

送朱大歸淮養親

旅棹歷淮陽春亭酒正香
賢兄開絳帳季弟侍萱堂
郢

樹侵吳近淮流入海長一杯分散後歸鴈是同行

憶鄭二宣時往交州

旅棹若乘空春遊近日東遙憐滄海客共是白頭翁
雨霽魚吹浪天遥鵲借風清冷臺下路樽酒幾時同

送張任遠之潁上

北謫非吾土南歸下首丘遙居黃霸治未遂赤松遊
古柳垂春蔓沙河急暮流離分君莫歎風壤是中州

遊烟霞觀

不作南宮吏來從物外遊閒傾松葉酒醉度菊花秋谷
響疑天積霞綃結海樓下方塵市近俯檻笑蜉蝣

夜飲王六博士宅留別

王喬能受士留客酌胡麻予亦蓬蒿者憐君意氣賒碧
階流月色綠竹拂霜華明日滄溟去雲帆挂海霞

送孫揮下第歸江東

灞陵楊柳色樽酒送行塵得桂都緣命看花莫怨春雲
霄翔自遠途路別來頻足馬東南去高堂有老親

江上寄巴東故人

我憶巴東客長為江上吟
楚雲將夜夢湘月寄愁心
落日青楓樹秋風白帝砧
遙傳一紙淚讀罷想沾襟

送白少府送兵隴右

冠冕中朝貴風塵隴路賒
三軍隨虎竹萬里度龍沙
古戍冰成畢春湟雪作華
天驕猶未靜行矣莫思家

留別陳令大有

相知嗟久別相見復離群
別路隨秋雨回車入暮雲
楓

金史卷之三
卷二
林千葉落河水數支分若見空梁月含情定憶君

留別周彥

心知三十年此去重潛然挂席趨京闕看雲別海天溪
橋寒吐月驛樹晚藏烟仁者多言贍希君白雪篇

送卞從事之河南

翩翩玉面驄去去逐秋蓬見鴈辭閩海看山到洛中營
門閒步月賓館靜吟風共說歸來日離花已滿叢

送黃令之永寧

作牧成周地分攜建業舟孤燈聞鴈夕落葉度江秋雲
路看高翥京塵感舊遊離情如洛水日夜向東流

送鄭秀才旭

寧親初戲綵祖道又分襟漸遠趨庭訓偏驚去國心關
雲遮越斷海雨入吳深壁水多麟鳳期君競寸陰

遊靈隱寺

靈隱知名剎龍宮最上方越山當戶翠海樹到樓香說
法觀身妄懸燈共夜長浮生一何幸乘此禮鑒王

宿雲門寺

龍宮臨水國，鳥道入烟蘿。
海曠知天盡，山空見月多。
鶴歸僧自老，松偃客重過。
便欲依禪寂，塵纓可奈何。

送周生往雷州

寧親歸未得，念子復南征。
風雨孤舟別，滄波幾日程。
挂帆辭海國，吹笛上邊城。
旅館知相憶，新秋有鴈聲。

宿靈異上人房

青蓮開梵宇，白社結詩壇。
洞古留雲宿，樓虛挂月看。
洗

杯泉影落掃石竹光寒莫怪棲遲久朋簪念二難

遊方廣岩

玄岩太古色恍若入鴻濛一逕攀躋盡諸天杳靄中雲
歸山殿冷月出水簾空境靜離言說泠泠松桂風

荷亭夜坐分得山字

池亭清夏暑吟眺夜忘還秋氣月中早晚心池上閒危
襟涵玉雪幽夢即雲山明日清泠頂岩扉共一攀

秋日同韓玄登凌霄臺

故人多逸興攜手上高臺賦為閒居作懷因遠眺開秋
陰將日去鴈影帶寒來歸路瞻衡宇松門掩綠苔

詠齋中竹

托根臨泮水終異在林丘色映疎簾雨聲傳靜院秋栽
冠龍籜潤製律鳳柯修散帙多閒日能陪六逸遊

送殷秀才之武功

送君遠行役覲省入西秦五月臺江水孤舟去國人蒼
山低戍壘野日暗行塵無限同遊意分攜汨滿巾

徵書後呈治城同志

青門初稅駕紫陌罷鳴珂
野興看山盡花時中酒過同
心難契闊失路易蹉跎
又欲羈塵綬幽期可奈何

早秋有述寄林八先輩

澤國風雨後貧居離索情
亂蛩鳴曙井一葉落秋城
薤簾邀涼早荷衣却暑輕
清冷臺下路攜手幾時行

同林秀才敏鄭生炯遊末山寺

野寺集秋色門間掩古苔
偶尋青草逕遙入白雲來
山

葉風自落砌花寒始開幽期重九日即此醉陶盃

春日宴林氏園亭

故人邀客處別墅帶林塘身外名堪避樽前迹暫忘鳥
飛潭樹暖花落野泉香乘興留題去西嶺挂夕陽

為釋東旭詠白蓮

淡月瑤池夜微風太華陰翠翻擎露蓋玉冷墜波簪一
洗有為法應全不染心誰能招惠遠結社向東林

詠雨竹

閉門對山雨隱几咏琅玕滴瀝明珠碎離披翠羽殘烟
中看葉重風裏覺枝寒湘女當年淚于今豈未乾

秋日登平遠臺

蘭若最高處客來開夕窓詩懷秋思集定力壯心降遠
樹青殘雨歸潮白晚江暝來期宿此斂屢對寒缸

送武平判簿

少府朝天日雲霄一鳳毛已隨冠冕入暫輟簿書勞曉
驛馳星騎春帆拂露濤行當逢聖代幾日醉仙桃

送武平令入覲

作牧留遺愛分攜惜別情
雙鳬將舄去一鶴與琴清
積水浮征棹蒼山繞禁城
懸知書上考行見被思榮

送韋戶侯伯俊

青山慕侯印弓劍挂南陲
月滿罷觥帳雲開翡翠旗
林花春載酒園竹曉彈碁
不獨龍韜熟文章爾更奇

寄菊圃都護

相識成何事相思總是愁
文章空潦倒歲月自淹留
劍

沈清潭曉琴抽野菊秋皇輿開九域白髮好封侯

寄建溪周校文

白髮江湖上雄文最數君每憐金作賦更道鶴為群竹
圃諸生頌松門酒客分離憂無處托魚鴈幾時聞

擬王維登裴秀才迪小臺

高臺一登眺滿目白雲深況與林間士俱閒物外心嵐
光當几席秋色上衣襟更待今宵月與君同嘯吟

秋聲

浙瀝初蕭索寒聲處處疑園林風起夜庭院月明時客
思愁宵永秋商入候悲淒涼孤館閉鄉念有誰知

秋日登石壁精舍

攜琴向何處因訪梵王宮潭影漾秋白楓林鳴晚紅
空啼鳥寂地僻野泉通欲辯來時路蒼茫翠靄中

春日登湖山

白日好幽寂常登勝槩頻寒泉漱清沼啼鳥亂芳春
極目臨霄漢虛心絕垢塵及時當作樂歲月苦催人

題夕陽孤棹送鄭二之交州

離亭夕景遲遊子去何之白髮孤舟別滄溟萬里期鄉
心春鳥喚旅泊夜星隨無限分攜意殷勤唱竹枝

送應舉議歸鄞江

明府才能贍三吳舊縉紳遐方得循吏聖代喜儒臣鄞
水南歸海丹山東入閩因知懷惠日兩地總陽春

送李通守歸鐔上

憶昔招談日清吟每自如春風花下酒秋月竹間書雲

關開賢路鐔津迓使車咨詢今有便青眼慰寒居

送絕塵上人遊江南

南國隨緣到應無去住心聽鐘尋野寺乞食施山禽晒
衲梅風潤浮杯瘴海深遠公多古迹只合老東林

送牛道士

先生有道者曾說遇茅君辟穀唯餐日無家祇卧雲丹
光分月色劒氣動星文悵望雙鳬遠秋風建水濱

夜泊淮陰

泊舟淮水次津樹暗蕭蕭遠火明漁舫長吟倚客簫夜
鐘聞古寺寒月照歸潮莫近啼猿處愁多夢更遙

送友人之京

對酒臨津樹傷心莫我違遙懸霄漢望獨折桂枝歸遠
騎看山別征帆帶雨飛送君從此去何日玩清暉

五言排律

甘露應制

聖主開休運神漿降帝州密沾花錦重輕拂柳金柔月

暗迷仙掌宵分瑩玉樓
光含堯殿曉冷沁漢宮秋
赤甕芳空貯芳林謾早收
無才堪紀述何以動宸旒

登瀛二首

聖世風雲會文衡
日月懸五星同聚井
六德共賓賢射隼
乘時獲登龍計日先金臺
鍾秀氣瀛海儼神仙
月殿森芳桂瓊林列綺筵
停驂三島上飛珮
百花前多士騫騰日
明良泰治年始知逢
掖貴何必躡凌烟

其二

九州連一壤三島不殊鄉雲作長安路洲通弱水航星
河搖寶劍日月煥文章翠苑天葩麗珠林莖葉涼綉楹
金蠶蛭吹榭玉琅璫廣樂飛蝴蝶霓裳下鳳凰八珎行
月殿萬壽進霞觴景氣吞今古榮光接混茫仰聆天語
近俯視地維荒探手資玄運捫心見赤藏才非鸚鵡匹
群逐鷺駕行詎復論汾上長專蛻骨香

送陳明府出守南陽

帝世符文治侯邦重選臣八龍開戶牖五鳳出絲綸地

接全吳盡風仍故楚淳山容迎露冕日色動朱輪應闕
風雲迥隨車雨露均聖情鍾草澤一為問沈淪

送鄭孝廉之京

天書下紫宮星象動璿宮丹穴鏘鳴鳳青冥起漸鴻彈
冠千里別傾蓋一樽同風雨情何極雲沙路不窮津橋
迎彩鷁驛樹引嘶驄月關河迥晴蕪楚澤空交情懷
契闊直道任窮通知遇期皇鑒君毋嘆轉蓬

朱將軍平寇

五嶺連烽火三軍擁節旄
專征分虎竹上略用龍韜
地險兵聲合天秋殺氣高
炎荒開洞穴瘴海息波濤
氣益干城壯功推敵愾
勞陰符資廟筭露布出詞
曹振旅聞聞鼓休兵看韃
橐獻俘飛奏捷行見軍書
褒

元夕觀燈之作

授厯逢春正張燈是此宵
雄藩誇樂事大運屬昌朝
錫酺千家醉含哺萬姓饒
兔輪開月馭鰲極駕星橋
律轉條風至陽暄朔雪消
宛駒來騷褭洛浦出妖嬈
隊合紅

空暗香焚紫霧飄金蓮燃蠟炬玉樹度雲謠醉態欺寒
淺歡情愛夜遙願言歌擊壤萬壽祝唐堯

中秋凌霄臺翫月

福地鄰三島朋簪盍二難逢秋能作賦見月即同看地
迴青天近波澄碧海寬流輝初熠熠載魄正團團桂影
浮山殿珠光射石欄風來金氣肅河瀉玉津寒搗藥深
憑兔吹簫或駕鸞沾衣垂露葉散步倚雲巒醉飲徒傾
倒神遊極汗漫自然超世累何必上天壇

同陳秀才登虎頭岩

勝槩殊三島層闌敞八風雲霞開玉壘日月遶珠宮鳥
道蒼烟外軍城紫氣中山河襟帶遠樓觀畫圖雄物候
逢秋異登攀與子同憶家滄海闊懷古霸圖空地暖初
聞鴈江寒已落楓振雷隨急雨野日截殘虹歲月空流
水飄零極轉蓬江湖歸未就徒此羨漁翁

九日登翠簾山

翠嶺出天中岩峩到半空歲時陶令節登眺楚人風葉

盡聞虛籟天清見斷鴻別家滄海上戀闕五雲東暫就
囊萸飲誰論戲馬雄醉鄉可栖息渾不記飄蓬

王屋山天壇

名嶽推王屋孤標跨杳冥深窺砥柱黑高並太行青分
野連三晉風雲萃百靈鶴歸松已偃龍去水猶腥竈隱
燒丹火龕餘煉髓經羽人金磬動應此禮寒星

三教堂蘭若

勝地傳三教空山少四鄰溪流舊回合峰勢此嶙峋松

桂風吟夜莓苔雨度春經殘蘿逕月燈掩石龕塵堯率
疑天界維摩恐後身布金還長者攜酒屬詩人心遠雲
堦卧門閒鳥自馴早祈蓮社就來此息貪嗔

同鄭逸人宿西山寺

翠壁開西麓金宮隱上方雲霞橫鳥道日月煥龍章桂
殿丹青古松門草木蒼潭空窺鳥影夜靜識天香夢裏
觀生妄閒中歷劫長千山孤磬雨一逕落梅霜無復悲
生事莫如禮法王諦聞龍象喻初地入清涼

送李長史歸吳中

祖道大江流，離筵起暮愁。
山川臨越徼，詞賦動高秋。
興入張生贈，歸餘季子裘。
家林逢鴈到，旅棹共星浮。
已說荒三迥，常懷卧一丘。
朝簪辭白髮，野趣入滄洲。
知己慚踈闊，臨歧謾唱酬。
都將平昔意，乘醉一登樓。

劍閣秋陰圖

分野秦封盡，山川蜀國雄。
塹江流地底，劍閣起天中。
棧險崖頻轉，蘿深月不通。
飛揚軒百帝，開闢竄叢氣。
候

三秋異猿聲衆壑同棟雲常礙日岩樹遮呼風客路隨
飛鳥鄉心挂落楓茲非曠達士應此泣途窮

逢牛尊師

道逢牛道士把酒醉雲房龍問壺中訣人傳肘後方久
知鳬是舄更指石為羊遣興聊題翰無言但括囊秋星
明劒氣夜月釀丹光酣飲從傾倒神遊極混沌別情波
渺渺歸路樹蒼蒼又櫂扁舟去尋雲到草堂

賦得征馬嘶送李將軍出塞

俠客紫驂騶翩翩欲遠遊玉禾初秣曉金勒迴鳴秋思
入雲沙遠途經雨雪愁將風殘木葉摧月下城樓僕御
皆惆悵賓朋互唱酬看君憑汗血行矣取封侯

冬日同林秀才遊行真觀

蓬島烟霞合琳宮日月開洞陰常積雪地古半藏苔竹
已成龍去人因訪鶴來欲飛王令舄且醉葛洪盃菓熟
經時換炊香待夢回晴光偏悅鳥臘色尚欺梅意靜寒
泓水心同槁木灰鳳笙如可學吹月上瑤臺

輓胡延平

位列諸侯重身將砥柱推文章餘諫草德望罷鹽梅赤
子天空顓黃堂晝不開月寒蒿里閉溪古劍光埋執紼
諸生慟招魂五馬回誰鑄鐔水石一寫峴山哀

送陳主簿稔之延平

才子甌閩彥雲霄紫鳳毛一朝辭囊簡萬里試牛刀邑
小程書簡民疲撫字勞分簪嗟去國攜手戀同袍白水
河源遠蒼山積石高政成多暇日揮翰寄儀曹

重遊宿雲臺憶肅上人

昔日談經處今來獨上慵
古臺黃葉積斜磴紫苔封
片月疑禪觀孤雲想化蹤
夜燈無續火秋院有鳴蛩
人倚題詩竹誰栽出世松
夕陽無限思幾杵暮天鐘

同黃貢士登清冷臺翫月

山川收晚霽暝色上高臺
共是吟秋客還同看月來
衣冠林藪逸詞賦柏梁才
山鬼驚聯句沙禽避洗盃
河低全拂樹露重稍滋苔
海上鮫人出雲中桂子開
樂遊良

夜劇高興昔人諧歸去金溪上看雲首重回

來月池

遠公精舍下碧沼湛寒泓地底兼天淨波心見月明桂
移銀漢濕珠蘊玉壺清坎滿流恒止離虛混自平禪心
通觀想野客助吟情已喜朝簪擲應來此濯纓

暮春遊林七欽園亭得朝字

星駕共招邀春園發興遙麥風將變候梅雨忽崇朝積
石開蒼島重樓瞰赤霄池晴魚弄沫地暖藥舒苗啼鳥

當窻近飛花逐砌消草深初雉槐細未藏蜩茗椀香
雲滑床琴白雪調野泉堪薦醴天籟訝聞韶被褐深懷
玉裁詩擬報瑤醉鄉今已到何必躡洪喬

秋日同王校文登聖泉宮

玉洞烟霞古珠林輦路遙泉香懸菊瀑竹響度松颿疊
嶂分蒼島危樓瞰紫霄芳樽攜就草清梵聽疑潮弔古
塵蹤杳觀空世慮消由來希習靜心境自寥寥

秋日同韓玄登宿雲臺

野客滄洲至乘閒上古臺江分平野斷樹盡遠天開散
策尋芳草班荆坐石苔秋陰將日去鴈影帶寒來香積
雕胡飯筵芳竹葉盃相逢成暫醉何必問蓬萊

賦得流泉別林山人

青嶂雨初晴流泉一派清映空涵月色入夜帶秋聲落
礪銀河瀉穿雲玉練明引來山逕潤觸起野潮平靜想
和琴曲幽宜濯冠纓滔滔常不已酷似別君情

竹林寺賦得園字

醫王多寶地長者給孤園入社逢僧夏尋山到水源樓
開天海色逕掃石苔痕碧篠巢烟鳥青松裊露猿靜言
依愚苑永矣謝華軒此意無人會惟應達者論

登白鶴嶺

青山踰鶴嶺碧海望鯨川樹拂扶桑日岩栖若木烟土
風驚異域星紀逼殘年草白寒威冽梅開暖律旋雪消
泉動脉風急燒侵田病涉溪頻轉乘空棧若懸壯遊渾
漫爾風志豈徒然憑闕紅雲裏歸休白髮前長途今若

折直道古如絃放逐應無愠懷哉柳下賢

宿雲臺燕集

海雨淨炎歊昏星換斗杓天開青杏靄帝返赤飄搖歷
覽龍宮迴躋攀鳥道遙碧筒通露飲白雪度雲謠列岫
疑看畫冷風訝奏簫竹深涼氣早苔密露痕饒祇樹栖
馴鳥禪枝咽暝蛭園紅將下葉海白欲歸潮北關休通
籍東林喜見招棲遲心石古衰颯髮蓬凋失路孤生感
觀空萬慮消漫遊聊取醉何必躡洪喬

首春遊道山有述

易象所逢春王春正建寅梅寒將臘去椒暖薦時新地
欽收舊義天開發有仁百生逢鼓舞萬類荷陶鈞曉沐
初彈積春衣始振塵登山遊寶所擲地禮金身谷響歌
林鳥川遊在藻鱗青舒門柳眼紅破苑桃唇坐嘯風生
簾行採草薦裊濁醪嗟中聖清茗愛怡神纓冕休勞夢
雲山願卜鄒慧燈如可續永矣照迷津

輓理上人

隻履歸何處懷師淚滿襟浮雲生滅性明月去來心
閱世真如夢安禪不廢吟留衣分法侶寫偈別朋簪
雨蘚侵行跡風泉想梵音一燈寒竹暝雙樹落花深
塔閉蟲粘戶巢空鶴避林厯峰山下路從此罷登臨

擬李謫仙秋日登揚州西靈塔

三天分絕頂一氣破層標夜月侵牛斗秋河界鵲橋
潮聲雲海近闕影帝城遙滉漾珠光動空濛瑞氣饒
長風如可借九萬欲扶搖

春暮宿湖山蘭若

雨歇衆芳晚幽尋宿梵筵聞經方丈裏聽法比丘前遠
逕投昏鳥荒山嘯夜猿天花飄嶂月玉磬度蘿烟殿古
苔衣合湖光月鏡圓仰板星斗近俯視地維偏心靜空
塵到身閒與世遷三生應得悟來此問安禪

鳴盛集卷二